



Broj: 01-26-10-37-1/22
Sarajevo, 17.02.2022. godine

Konkurencijsko vijeće Bosne i Hercegovine, na osnovu člana 25. stav 1. tačka a), a u vezi člana 35. stav 1. tačka b. Zakona o konkurenciji („Službeni glasnik BiH“, broj 48/05, 76/07 i 80/09), člana 61. stav 2. Zakona o upravi ("Službeni glasnik BiH", broj 32/02, 102/09 i 72/17) na 99. (devedesetdevetoj) sjednici održanoj dana 17.02.2022. godine, donosi

UPUTSTVO
o načinu prikupljanja podataka provođenjem radnje neposrednog uvida

Član 1.
(Predmet)

- (1) Ovim Uputstvom se propisuje način postupanja i provođenja postupka prikupljanja podataka provođenjem radnje neposrednog uvida u postupcima pokrenutim Zaključkom o pokretanju postupka pred Konkurencijskim vijećem, s ciljem omogućavanja provođenja Zakona o konkurenciji, i dodijeljenih zakonskih ovlaštenja.
- (2) Neposredni uvid je radnja kojom se neposrednim uvidom na licu mjesta vrši kontrola rada, poslovanja i postupanja privrednih subjekata na tržištu, a u vezi sa pokrenutim postupkom povrede tržišne konkurencije, ili ocjene dopuštenosti koncentracije.
- (3) Privredni subjekti kod kojih se može obaviti radnja neposrednog uvida su stranke u postupku, ali i bilo koja druga pravna ili fizička osoba, udruženje privrednih subjekata, privredne komore, udruženja potrošača, organi državne uprave i lokalne samouprave, kao i svi ostali privredni subjekti obuhvaćeni članom 2. Zakona o konkurenciji.

Član 2.
(Pravni osnov)

Pravni osnov za provođenje radnje neposrednog uvida je sadržan u članu 35. stav (1) tačka b) Zakona o konkurenciji.

Član 3. (Ovlaštene osobe)

- (1) U predmetnom postupku član Konkurencijskog vijeća i državni službenik koji su imenovani za voditelja postupka i ovlaštenog državnog službenika, u skladu sa Odlukom donesenom od strane Konkurencijskog vijeća, ovlašteni su obaviti i radnju neposrednog uvida.
- (2) Ukoliko su za obavljanje neposrednog uvida, potrebna posebna stručna znanja (tehničke ili neke druge struke) u obavljanje neposrednog uvida može se, na prijedlog Voditelja postupka, uz suglasnost Predsjednika Konkurencijskog vijeća, pored ovlaštenih osoba, zadužiti i državni službenik Konkurencijskog vijeća koji posjeduje stručna znanja za obavljanje potrebne radnje.

Član 4. (Zahtjev)

- (1) Ukoliko se Voditelj postupka odluči o potrebi obavljanja radnje neposrednog uvida, privrednom subjektu se šalje Zahtjev koji obavezno sadrži:
 - a) pravni osnov,
 - b) predmet i svrhu zahtjeva,
 - c) rok za njegovo provođenje, te
 - d) upozorenje o mogućnosti izricanja kazni za nepostupanje po predmetnom zahtjevu, u skladu sa članom 49. i 51. Zakona o konkurenciji.
- (2) U Zahtjevu će se navesti i osobe koje će izvršiti neposredan uvid, te zatražiti od privrednog subjekta da u određeni dan i sat, osiguraju odgovorne osobe za komunikaciju, koji imaju pristup svim traženim podacima.
- (3) Zahtjev iz stava (1) ovog člana mora biti razmjeran, te ne smije prisiliti strane u postupku, druge pravne ili fizičke osobe kod kojih se obavlja radnja neposrednog uvida, na priznanje povrede Zakona o konkurenciji.

Član 5. (Prikupljanje podataka)

- (1) U provođenju postupka, stranke i druge pravne i fizičke osobe, kod kojih se obavlja neposredan uvid, dužne su na zahtjev Konkurencijskog vijeća ili službene osobe omogućiti uvid u:
 - a) sve poslovne prostorije,
 - b) svu pokretnu i nepokretnu imovinu,
 - c) poslovne knjige,
 - d) baze podataka, kao i
 - e) bilo koju drugu dokumentaciju i u tome ne može biti spriječen poslovnom, državnom ili tehničkom tajnom.

- (2) Prilikom obavljanja neposrednog uvida predstavnici Konkurencijskog vijeća su ovlašteni izvršiti uvid u sve potrebne obavijesti, pisane podneske, dokumente, elektronske poruke, snimke, kao i bilo koje druge predmete koji sadržavaju pohranjene informacije, bez obzira na medij na kojem su pohranjene, uzeti usmene izjave, kao i zatražiti dodatna pismena očitovanja.
- (3) U provođenju postupka predstavnici Konkurencijskog vijeća će izuzetu dokumentaciju fotokopirati ili snimiti na prikladan medij.

Član 6.
(Poslovna tajna)

- (1) Kada podaci i dokumentacija do koje se u postupku dođe sadrže poslovnu tajnu, strane u postupku, druge pravne ili fizičke osobe kod kojih se obavlja radnja neposrednog uvida obavezne su istu označiti, uz obrazloženje, koji podaci i zašto se smatraju poslovnom tajnom.
- (2) Predstavnici Konkurencijskog vijeća će sa podacima koji sadrže poslovnu tajnu postupati na način da se ista ne ugrozi, u skladu sa čl. 38. Zakona o konkurenciji.

Član 7.
(Zapisnik)

- (1) O obavljenoj radnji neposrednog uvida potrebno je sačiniti zapisnik.
- (2) Zapisnik se sačinjava, potpisuje i dostavlja po pravilima upravnog postupka.

Član 8.
(Stupanje na snagu)

Ovo Uputstvo stupa na snagu danom donošenja.

Predsjednik

Dr. sc. Amir Karalić